

# Verda fa naufragi – burgais salvan la pussanza

## La reelecziun nunspectaculara dal cussegl federal

DA MARTIN CABALZAR

■ **L'assemblea federala ha reelegi clermain ils commembers e las commembras dal cussegl federal d'enfin uss. L'attatga dals verds cun Regula Rytz n'ha gi nagina schanza. Simonetta Sommaruga è nova presidenta da la confederaziun.** La situaziun da partenza per la candidatura da la presidenta dals verds *Regula Rytz* è stada difficila, ses naufragi era programmà, uschia che sia sconfitta n'è betg stada ina surpraisa. Speculà han ins silpli anc davart ses resultat. Clermain en sia favur eran sulettamain ils verds ed ils socialdemocrats s'exprimids. Il spectrum sanester che consista da verds e socialdemocrats aveva pia in potenzial dad 83 vuschs en l'assemblea federala. La finala ha *Regula Rytz* survegnì 82 vuschs tar la reelecziun dad *Ignazio Cassis*. Lez ha survegnì 145 vuschs ed ha uschia pudì defender ses sez en la regenza svizra. Sche *Rytz* ha era survegnì vuschs dals verd-liberals, sco quai ch'igl era vegnì annunzià, n'han probabel betg tuts socialdemocrats votà per la presidenta dals cerds. Pertge la Partida socialdemocratica e la Partida verda han ensemen 83 vuschs.

### Nagin sez per ils verds

La verda *Regula Rytz* ha reagì cun ina tenuta cumbattanta sin sia terrada. La partida verda saja e restia pronta da surpigliar responsabladad, ha ella ditg. La rolla dals verds restia er en il futur la medema: Bajegiar punts ed elavurar ensemen cun ils auters refurmas: «Nus vegnin a collavurar vinavant constructiv – deplorablmain en la opposiziun e betg en la regenza», ha ditg *Rytz*.

Il schef da fracziun dals verds, *Balthasar Glättli*, n'è betg surprais ch'i n'è betg gartegià a sia partida da survegnir in sez en il cussegl federal. Per el èsi cler ch'ils verds ston uss adina ponderar la strategia

cura ch'in sez en il cussegl federal è puspè vacant. La proxima schanza sin in sez en il cussegl federal han ils verds sch'ina cussegliera u in cusseglier federal sa retira anticipadamain u il pli tard en quatter onns.

### Ils burgais mantegnan la pussanza

Cun la sconfitta dals verds è stà da quintar. Dad ina vart avessan els numericamain tuttavia il dretg sin ina sutga en il cussegl federal. Lur pretensiun è dentant stada politicamain prematurada, han pcd, ps e pps era stuì spitgar ditg e lung fin ch'ins ha acceptà lur candidatura e resguardà el tenor lur forza a basa da lur electorat. Cun ir prematuradamain e

senza coordinaziun en l'offensiva – senza spitgar la decisiun da la fracziun e senza consultar ils verd-liberals – ha la parsura *Regula Ritz* catapultà sa sezza en l'offside.

### Posiziun da las fracziuns

Als verds n'èsi betg reussi da persvader singuls parlamentararis da las partidas burgaisas da dar lur vusch. Ils verds avessan duvrà il sustegn da la pcd e dals verd-liberals. Entant che la pcd ha renvià uffizialmain ses sustegn han ils verd-liberals dà liber la vusch. En lur votums avant l'elecziun han ils schefs da fracziun dals verds accentuà lur confess en favur da la cuncontinuitad e da la concordanza. «Nus

mettain in segn per la stabilitad e cuntinuitad da noss pajas», ha ditg *Leo Müller* (LU) en num da la fracziun dal center che consista or da pcd, pbd ed pev. I giaja dentant era per resguardar l'incumbensa costituziunala che tut las regiuns linguisticas da noss pajais sajan represchentadas commensuradamain en il cussegl federal. En num da la pld ha il schef da fracziun *Beat Walti* (ZH) constatà che la stabilitad saja in'impurtanta basa e premissa per il success da la Svizra. «Da quella stabilitad stuain nus avair bun quità», ha ditg *Walti*. Il schef da la fracziun da la pps *Thomas Aeschi* (ZG) ha taxà ina nunelecziun dal cusseglier tessinais «per «absolut exclusa».



La candidata dals verds *Regula Rytz* ha reagì cun ina tenuta cumbattanta sin la terrada.